

AL-QUR'ĀN AL-KARĪM PUSAT KEBUDAYAAN DUNIA

Penjelasan Hadis Tentang Kitab Suci al-Qur'an

"Di dalam al-Qur'an al-Karīm telah diturunkan tiap-tiap ilmu pengetahuan, dan telah diterangkan di dalamnya tiap-tiap sesuatu, tetapi ilmu kita tidak terdaya mencapai pengetahuan yang sepenuhnya akan apa yang telah diterangkan kepada kita di dalam al-Qur'an itu."

Demikian kata 'Abd Allāh ibn Mas'ūd, sebagaimana yang diriwayatkan oleh Ibn Jarīr dan Ibn Abī Ḥātim.

Perihal al-Qur'an al-Karim satu persatu telah diterangkan oleh *al-hadīth al-sharīf* dengan sejelas-jelasnya. Yang pertama sekali diterangkan olehnya bahawa kitab suci al-Qur'an itu ialah sebuah kitab yang lengkap, yang diturunkan dari langit, sebuah kitab Allah yang meliputi segala-galanya, tidak ada suatu perkara atau benda yang kecil atau yang besar melainkan telah disebut dan dihitungnya, dan tidak ada sesuatu rahsia atau sesuatu hukum melainkan telah diterangkannya dengan tegas atau dengan isyarat dan kiasan.

Benar, sekalipun segala yang disebutkan itu, harus telah sedia diketahui daripada firman Allah *Ta'ālā* di dalam al-Qur'an sendiri, seperti firman-Nya: "Wa anzalnā ilayka al-kitāba tibyānan li kulli shay" (Dan Kami telah turunkan kepada kamu al-Qur'an menjadi penerangan bagi tiap-tiap sesuatu), dan firman-Nya: "Mā farraṭnā fi al-kitābi min shay" (tidak ada sesuatu pun yang Kami tinggalkan – daripada menyebut dan menghuraikannya –

di dalam al-Qur'an), dan benar juga telah diperintahkan supaya kita bertanya tentang perkara-perkara yang tidak kita mengetahuinya, sebagaimana firman-Nya: "Fa is 'alū ahl al-dhikri in kuntum lā ta'lamūn"¹ (Maka bertanyalah kamu kepada ahli zikir – ahli ilmu pengetahuan tentang kitab Allah – jika kamu tidak mengetahuinya). Benar, semuanya itu telah pun sedia dijelaskan oleh al-Qur'an sendiri, tetapi hadis Rasulullah *ṣallā Allāh 'alayhi wasallam* telah menambahkannya dengan penjelasan yang lebih luas, dan telah menghuraikannya serta mentafsirkannya satu persatu.

Al-Qur'an Meliputi Segala-galanya

Di antara penjelasan hadis yang selengkap-lengkapnya tentang kitab Allah al-Qur'an ialah hadis yang disebut oleh al-Tirmidhī dan lain-lainnya daripada 'Alī – bin Abī Ṭālib – *radī Allāh 'anhu*, ujarnya yang bermaksud:

"Aku telah mendengar Rasulullah *ṣallā Allāh 'alayhi wa sallam* bersabda: "Akan terjadi fitnah-fitnah (kekacauan

¹ Ayat dalam majalah Qalam ditulis salah, iaitu *Fa is 'alū ahl al-dhikri kuntum lā ta'lamūn* (tanpa *in*)

di dalam kalangan umat Islam) seperti peringkat-peringkat malam yang gelap gelita”, aku pun berkata, ya Rasulullah, bagaimana jalan keluar daripadanya? Sabdanya: “Kitab Allah *Ta’ālā*, di dalamnya terkandung perihal orang-orang yang terdahulu daripada kamu, dan berita perkara-perkara yang akan datang kemudian daripada kamu, serta hukum perkara-perkara yang sedang dihadapi oleh kamu. al-Qur’ān itu ialah kata pemutus bukan olok-olok, barang siapa meninggalkan dia kerana ungkal dan zalim maka al-Qur’ān akan mematahkan kezalimannya itu, dan barang siapa mencari pertunjuk pada yang lain daripadanya, akan disesatkan oleh Allah.

al-Qur’ān ialah tali Allah yang teguh, cahayanya yang terang benderang, dan peringatan yang berhikmah. Dialah jalan yang betul, yang dengannya hawa nafsu tidak tergelincir, dan dengannya lidah tidak tersasul, dan dengannya juga fikiran tidak bersimpang-siur. Alim ulama tidak berasa kenyang daripadanya, dan orang-orang yang takwa tidak berasa jemu kepadanya. al-Qur’ān tidak akan lusuh kerana banyak kalinya diperulang-ulangkan orang menyebutnya, dan tidak pula akan terhapus segala keindahannya. Dialah yang menyebabkan jin berkata ketika mendengarnya: “Kami telah mendengar al-Qur’ān yang amat menakjubkan”. Barang siapa mengetahui akan ilmu al-Qur’ān akan mendahului ia (akan ahli-ahli pengetahuan yang lain), dan barang siapa menuturnyanya akan benarlah ia (pada segala tutur katanya).

Barang siapa pula berhukum dengannya akan berlaku adillah ia, barang siapa beramal dengannya akan beroleh pahala, dan barang siapa menyeru kepadanya akan beroleh pertunjuk kepada jalan yang betul.”

Hidangan yang Serba Lazat

Suatu hadis lagi tentang ini, telah diriwayatkan oleh Abū Bakar Muḥammad ibn al-Qāsim daripada Ibn Mas‘ūd,

katanya: Rasulullah *sallā Allāh ‘alayhi wasallam*, bersabda: *Inna hadhā al-Qur’ān ma ’dabah Allāh, fa ta ’lamū min ma ’dabatihī ma istaṭa ’tum.*” (al-Qur’ān ini ialah hidangan jamuan Allah, maka belajarlah kamu daripada hidangan jamuan-Nya itu sekadar yang terdaya oleh kamu).

Jelasnya, hidangan jamuan yang besar, biasanya penuh dengan berbagai-bagai jenis makanan yang serba lazat, dan tiap-tiap seorang dapat memilih apa yang diingini. Itulah sebabnya hadis Rasulullah yang tersebut, telah mensifatkan al-Qur’ān sebagai suatu hidangan yang telah disediakan oleh Allah ‘Azza wa jalla untuk manusia, mengandungi kebaikan dan manfaat, pimpinan dan pertunjuk untuk kebahagiaan mereka di dunia dan di akhirat.

Pengawas yang Amanah

Di antara perkara-perkara yang telah diterangkan oleh hadis Nabi berkenaan dengan al-Qur’ān, ialah bahawa al-Qur’ān menjadi penyokong kepada kitab-kitab yang dibawa oleh Nabi-Nabi yang terdahulu dan membenarkan apa yang terkandung di dalamnya (dikecualikan kerosakan dan perubahan yang dilakukan oleh pengikut-pengikut agama-agama yang tersebut terhadap kitab-kitab agama mereka). Ibn Abī Ḥātim meriwayatkan daripada ‘Alī bin Abī Ṭalḥah bahawa Ibn ‘Abbās telah mentafsirkan firman Allah Taala: “*wa muhaīminan ‘alayh*” ialah bahawa al-Qur’ān menjadi pengawas yang amanah atas tiap-tiap kitab suci yang terdahulu daripadanya.

al-Qur’ān sendiri telah menjelaskan hal ini, sebagaimana yang tersebut di dalam *sūrah al-Mā’idah*:

Wa anzalnā ilayka al-kitāba bi al-ḥaqqa muṣaddiqan limā bayna yadayhi min al-kitābi, wa muhaīminan ‘alayh. (Dan Kami – Allah – telah menurunkan al-Qur’ān kepadamu dengan kebenaran, membenarkan kitab-kitab suci yang terdahulu daripadanya dan menjadi pengawas baginya).

Menurut ahli-ahli tafsir, bahawa maksud al-Qur'an itu menjadi pengawas bagi kitab-kitab suci yang terdahulu daripadanya, ialah bahawa ia menjadi pengawas bagi segala kitab-kitab suci yang diturunkan Allah dari langit, yang terpelihara daripada kerosakan dan penukaran, iaitu menjadi saksi bahawa kitab-kitab itu betul (dikecualikan yang telah diubah dan dirosakkan oleh pengikut-pengikut agama-agama yang terdahulu itu), dan menetapkan usul syariahnya, serta menerangkan hukum-hukumnya yang telah *mansūkh*.

Dalam suatu hadis yang diriwayatkan oleh Imām Ahmad dan lain-lainnya daripada Jābir, bahawa tatkala Sayyidinā 'Umar membaca di hadapan Rasulullah beberapa ayat daripada kitab *Tawrāh*, baginda bersabda: "Law kāna Mūsā hayyan lammā wasi 'ahu illā ittibā 'ī." (Kalau Nabi Musa masih hidup nescaya ia tidak mengambil langkah selain daripada menurutku).

Hukum-hukum dan Tafsirnya

Di dalam suatu hadis yang diriwayatkan oleh al-Darimī, bahawa Rasulullah (S.A.W.) bersabda: "Wa alladhī nafs Muḥammad bi yadhihi law badālukum Mūsā fa ittabi 'tumūhu wa taraktumūnī laqalaltum 'an sawā' al-sabīl, wa law kāna hayyan, wa idrāk nubuwatī, la ittaba 'nī" (Demi – Allah – yang diri Muhammad di dalam kuasa-Nya, kalau Musa zahir dalam kalangan kamu, lalu kamu menurutnya dan meninggalkan aku, nescaya kamu akan sesat daripada jalan yang betul, dan kalau pula ia hidup, dan dia berada dalam zamanku menjadi Nabi, nescaya dia akan menurutku).

Jelasnya hadis-hadis Rasulullah *sallā Allāh 'alayhi wasallam* telah menerangkan perihal al-Qur'an dengan lanjut, iaitu menghuraikan maknanya, mentafsirkan nas-nasnya, menegaskan yang tegas, menjelaskan yang samar, melanjutkan yang ringkas, mengkhaskan yang am, mengikatkan yang khas;

dan menerangkan satu persatu akan hukum-hukum yang tersebut di dalamnya dengan ringkas, seperti sembahyang, zakat, puasa, haji, hukum bersuci, hukum menyembelih binatang-binatang sembelihan; dan juga menerangkan hukum nikah kahwin, dan segala yang bersangkutan paut dengannya seperti hukum *talāq*, *rujū'*, *zihār*, *li 'ān* dan lain-lainnya dan menerangkan pula kadar zakat dan waktunya, dan nasab harta benda yang wajib dizakatkan; dan juga menerangkan habisnya peringkat masa hukum yang pertama iaitu hukum yang telah *mansūkh* (yang telah dibatalkan dengan datangnya hukum baharu), dan menerangkan juga akan jalan menghubungkan hukum *qiyās*, serta mencabangkan – hukum berbagai masalah – atas kaedah-kaedah yang am. Hadis Nabi juga telah menerangkan hukum yang lebih daripada yang tersebut di dalam al-Qur'an, seperti haramnya nikah seorang perempuan kepada seorang lelaki yang sedia beristerikan ibu saudara perempuan itu dari sebelah bapa atau ibu saudaranya dari sebelah ibu.

Selain daripada itu, hadis Rasulullah telah menerangkan banyak perkara yang berlalu lanjut mengenai kitab suci al-Qur'an, di antaranya mengenai cara turunnya al-Qur'an, mengenai ayat yang mula-mula dan yang akhir sekali diturunkan, bahasa yang diturunkan di dalamnya, cara mengumpul dan meletakkan "*sūrah-sūrah*"nya, penulis-penulis dan *qārīn*nya (ahli bacaannya), cara mengajar dan mempelajarinya, kelebihan atas segala kata-kata yang lain, cara menghafaznya dan memahamnya, cara *tadarus* (*tadārūs*) dan membacanya berulang-ulang (sebagai ibadah dan supaya jangan lupa apa yang telah dihafazkan), hukum *tajwid* dan bacaannya yang betul, hukum membacanya dengan berlagu, cara khusyuk ketika membacanya, perbuatan riyak ketika membacanya, hukum menjadikan dia mata pencarian, dan banyak lagi mauduk-mauduk yang bersangkutan paut dengannya yang telah diterangkan dengan sejelas-jelasnya oleh hadis-hadis Rasulullah *sallā Allāh 'alayhi wasallam*.